

11 MAY 2001

Castro-Lawatan

CASTRO BERKATA LAWATAN KE MALAYSIA PENUHI HASRAT SEKIAN LAMA

KUALA LUMPUR, 11 Mei (Bernama) -- Presiden Cuba Fidel Castro, yang tiba awal pagi ini untuk lawatan pertamanya ke Malaysia, berkata kunjungan itu bagi memenuhi hasrat yang sekian lama dipendamnya untuk mengenali negara ini dan penduduknya.

"Lawatan rasmi ke Malaysia ini akan membolehkan saya memenuhi hasrat yang lama terpendam untuk mengenali negara ini dan penduduknya, budaya, sejarah perjuangannya, keindahan alam semulajadinya dan usahanya yang subur dan kreatif dalam bidang ekonomi dan pembangunan sosial," katanya dalam satu kenyataan.

Castro, yang memegang tampuk kuasa selama 42 tahun dan merupakan pemimpin dunia yang paling lama berkhidmat, berkata hubungan diplomatik Cuba-Malaysia yang dijalin pada 1975, telah berkembang dengan memuaskan.

Lawatan Perdana Menteri Datuk Seri Dr Mahathir Mohamad ke Cuba pada 1997 dan sekali lagi tahun lepas telah menyumbang kepada pengukuhan hubungan dua hala.

"Saya pasti kehadiran rombongan kami di Kuala Lumpur sekarang turut akan membawa kepada peningkatan hubungan yang memberi manfaat bersama dan kerjasama antara kedua-dua negara," katanya.

Beliau menyebut mengenai banyak persamaan antara kedua-dua negara, di sebalik perbezaan jarak dan budaya.

Sepertimana yang dikatanya: " Kita terikat bersama oleh perkongsian sejarah penjajahan yang lampau serta keadaan kita bersama sebagai negara yang kurang maju yang menuju kemajuan tetapi punya gambaran jelas bahaya besar yang mengancam Dunia Ketiga hari ini dan dengan bersama memutuskan untuk menolak daripada mengorbankan identiti serta azam kita kepada globalisasi yang ketara wujud ketidakadilan dan bahayanya," katanya.

Castro turut melahirkan kekagumannya dengan cara Malaysia dan kerajaannya yang dengan berani menghadapi kesan bencana krisis kewangan pada 1997 tanpa menyerahkan usaha mempertahankan kedaulatannya, mata wang dan paling utama kemerdekaan negara ini.

" Rakyat Cuba yang menjadi mangsa perang ekonomi yang ganas dan berlarutan lebih 40 tahun, merasakan semangat kesetiakawanan dengan Malaysia yang turut telah melalui penderitaan yang sama akibat order ekonomi dunia yang tidak adil," katanya.

-- BERNAMA

AU AU RON